

儀 嘉

鄭 穀

堂 堂

文 集



儀

鄭

堂

文

孔廣森撰
阮元敘錄

中華書局

儀鄭堂文

此據文選樓叢書
本排印初編各叢
書僅有此本

儀鄭堂文卷一

曲阜孔廣森撰 清 儀徵阮 元敘錄

孔廣森字衆仲號臯軒孔子七十代孫居曲阜乾隆辛卯進士官翰林院檢討聰穎持達曠代逸才經史小學沈覽妙解所學在大戴禮記公羊春秋九善屬文沈約蕭統可與共論錄儀鄭堂文二卷

武成頌

臣聞在天垂象金精耀參伐之旗惟聖憲時雷豫習行師之繇軒皇御錄先修赤水之征唐后垂裳必輯青邱之暴亦有周宣薄伐近在太原殷武哀師不踰荆楚而三年有賞易已象其成功千里來歸詩尙歌其永久方之今日靡得而言焉欽惟皇帝陛下秉武三會抗棱八表銀蟾拓地金虎開圖建木以西鑿空萬里長榆而北列藩千城象載形方規矩上黃麟之瑞銅街闢邸呼韓刑白馬之盟雲呂十旬記里之車合軌鞮胥九譯萑幣之史同文幽遐畢屆其梯杭泰遠咸歸乎幃幃而禹功不到西流自絕於朝宗梟性難馴東徙仍迷於革響乃有兩金川者鼉令游魂犬獠餘孽化殊天外犯熒塞以稽誅俗遠華中比夜郎而自大粵在卯辰之歲曾與戊己之師有以投戈許其載木恩寬愛社未封武觀之鯨鯢榮假分符俾禦危山之魍魎而乃獍心反噬鴟義矯虔不格兩階之干自投一面之網促浸土司索諾木負阻窺覲憑遐翻覆狝蛇薦食屢及於鄰疆蠻觸爭漸連於內地趨拉土司僧格桑登與甄比熊本龜生外順內違每

泄駒支之語。高巢陞制。擅詢句町之仇。議者猶以天險不可升。鞭長莫能及。轡野修戎之日。亦緩前禽。禽山台玉之年。非無後至。文臣臆決。請罷守於珠厓。哲后沈幾。命洗兵於玉壘。蓋以王鈇威遠。睽矢勝殘。保大定功。有征無戰。三辰所照。靡亭毒而或遺。九伐無私。孰佩離而必計。於是發軍城郭。簡銳微盧。闔虎朝鋪。人問沈黎之罪。跼蹙夜渡。衆爭敵愾之功。師出一年。月聞三捷。僧格桑棄地而遁。小金川全境以降。然而虎負嵎間。困猶思鬪。鷹棲韞土。飽卽背人。此則因壘之師。所以勞其再駕。渡瀘之役。必將示以七擒者也。聖天子昃晷思賢。綸書策將。重鑾門之命。寄專閫之司。爰以阿桂爲定西將軍。營平受律。羌罕料其成。禽裴相視師。淮蔡聞而悸魄。若乃降衝弗弗。旗鼓堂堂。朔簪燕弧。韞章鵲幟。索倫驟張之卒。吉林超距之徒。八旗試弁之倫。六郡良家之子。輶車百雉。挾風牟以駢驅。箬矢三鏃。怯雲鵬而墜影。庚鈴制勝。九天九地之兵。甲帳懸符。四正四奇之陣。再平美諾。一掃荒陬。熟彼妻孥。降其部落。月氏已死。漆函傳飲器之頭。微側爲俘。驛騎致蠻銅之鼓。惟是逆酋索諾木。連鷄失執。知必及於天誅。鋌鹿已窮。猶自恃其地利。環山列柵。背水施礮。奮螳臂以當輪。網蝥絲而結衛。羊腸西轉。自回九折之谿。牛尾東來。未鑿五丁之路。雪凝陰阪。經炎夏而不消。日遠陽關。積漏天而生瘴。我師長馳渠答。直冒槍雷。指揮則屋瓦皆飛。叱咤則丸泥失險。危城折箸。械九設而九攻。壯士乘墉。布再懸而再斷。文淵負羽。獨進壺頭。士載褰毼。親踰劍閣。遂以去年八月十五日。破勒烏圍。戈矛照月。鶴鵠之隊。彌旌旌旆。旆旆生風。鴨鵝之聲。盡亂斯時也。天子方講藝螭坳。修文虎觀。咨儒官於劉向。遣謁者於陳農。羽檄星馳。疊下五申之令。銅籤夜警。仍披二酉之編。豈非天

賈聰明。聖兼文武者。與刮耳崖者。軍道之衿喉。賊居之窟穴。地稱巖邑。山挺石林。孝子望而旋車。元侯行而束馬。六師併力。五尺略通。道古攻其東南。亞夫備其西北。九重籌筆。乃懸御於氏。羌三帥宣猷。更分功於卻。范狼弧氣。肅驥弩先飛。箕壁星高。火輜具舉。進攻黃寺。震誓其祇神。屢獲挾徒。係繫其母妹。我氣方銳。破竹無頓刃之勞。彼力益殫。蘇木有丁衝之急。幕危燕散。鼎沸魚驚。方陳縛主之求。始請吠堯之罪。今年二月四日。索諾木兄弟就禽。治問脅從。誅無填服。金城上奏。七朝達於長安。都護飛書。五日聞其吉語。葱靈執訊。露板慶成。比赤囊報至之時。當翠蓋巡行之地。勛過獲嘉之改縣。事同聞喜之名鄉。皇上展謁兩陵。奏膚七廟。靈臺上祭。卽陳丹水之功。畢郢升祠。自兆素鱗之慶。善歸聖母。敬上徽音。奉慈輦以豫游。遵翁河而哀對。杏花菖葉。兼省春耕。茆水芹宮。式迎秋駕。太山玉策。探瑞算之無疆。魯殿金絲。告武成之有截。旣而赤融效職。朱陸移躔。襄城迴訪道之輿。巴徼振凱旋之旅。條侯之屯細柳。擐甲冑以來朝。耿弇之在臨淄。降乘輿而親勞。然後有事宗社。大猷馘俘。秋官請纆。夏卿執鉞。戒彼費留之賞。廣我通微之封。桓鸞青圭。來召公於漢游。葱珩赤帶。拜方叔於新田。李霍助名。咸開東第。鄧襲毛髮。並繪南宮。雅奏勤歸。軍容譁鉞。玉關偃革。紫塞銷兵。鶴膝羊頭。仍入蘭鐫之庫。龍文驪子。散歸仙掌之山。雖復金母環來。樊侯鼎出。冠軍絕幕。刻石字於狼胥。博望浮槎。控河源於牛渚。未若殊鄰稟朔。荒裔占風。寶布時供。賕錢歲納。冉駝邪笮。交輸流沫之珍奇。傑休侏僂。疊聽提官之謳詠。是則豐京王會。列三臺於陰羽之中。洛水明堂。朝九采於應門之外。不假銜鉤之后。載十一征。豈惟通譯之選。餘四萬里。赫赫乎一人之聲靈。煌煌乎千

古之盛事。綜茲輕緯。可咸五而登三。勒之簡編。將襲六而爲七者已。臣忝列鴈行。粗窺豹管。聞西戎之者定。均慶於並天。念東土之瞻光。感鑒於私渥。懷深歸尹。語登揄揚。雖不工於文章。尙慚朱鷺饒歌之作。庶以載夫功德。亦附白狼槃木之餘。謹獻頌曰。

於鑠上聖。奄有下矩。象寄柔通。龜沙卽敘。奇幹善芳。肅慎文答。東漸日闊。西底月戶。孰敢不庭。膺我齊斧。九姓內藩。廿年外侮。蠢籬大邦。侵擾西土。邊吏上言。宸居赫怒。秉節調牙。發璋徵琥。桓桓定西。國之彊禦。總領戎旃。師干甄部。青叟從行。白徒束伍。有獲斯虜。其矯如虎。署道披圖。指形聚黍。裂彼右肩。斷其脣輔。爾險何依。爾遠何怙。縫革衝礪。叩籠飛炬。破易撥醴。動若摧腐。光豪帥醜。刮耳是聚。井底困蛙。穴中竄鼠。五兩振威。重山夷阻。季母旣禽。精夫亦虜。戎庭分犁。苗人安撫。紅旂之捷。奏行在所。讓德於天。告功於祖。大武承謨。達孝續緒。吉蠲上陵。甘露有消。瓊冊述徽。璇宮秩祐。安輦蓋輿。洪艫清籟。殷實協周。祈沈觀滬。水若恬流。登祇順扈。輯瑞岱宗。陳風嫺渚。淑問西庠。祭菜東魯。展采崇今。上儀稽古。飲至策勛。愷歌率舞。青增三隊。緹帷重組。嘉乃戰多。慰我勞苦。昔奏采薇。今歌杜杜。文相帷幄。武人櫓俎。榮以旂常。申之袞黼。形繪雲臺。聲垂銅柱。天語龍轡。雲章鳳舉。紀跡峻崖。勒崇膠序。詞揜岐陽。典高岫樓。乃闢南端。載升展宇。寮采師師。徼行楚楚。右列作士。左班祈父。鯁奏靈鼗。鯨鏗猛虜。僑榮染錦。尸禹釐鼓。南觀旣誅。重巽式溥。復稅農疇。緩租國庾。化洽橫舍。仁流圓圖。廣青衿員。赦緒衣侶。威肅春霆。澤沛夏雨。九塞清塵。四民安堵。唐平蜀道。周省淮浦。尙誦昌黎。猶詩吉甫。以今準往。瑣瑣何數。天錫皇帝。神聖文武。於千萬年。爲億兆主。

上座主桐城姚大夫書

五月十七日。領到惠製儀鄭堂記一首。如來郭騎。方窮寶玦之繩。恐效津龍。遽化豐城之劍。雕陵顧字。渙水騰文。歡喜奉持。回還誦讀。去天三尺。未喻聲高。繞極一句。定知塵起。伏惟夫子大人。立言不朽。下筆爲經。受書於河洛之間。講學於濂伊之表。斟酌體要。二百年吏部之文。含吐風神。六一翁廬陵之集。乃若子山宮體。丁廩小文。固有類於俳優。尙恥爲於執戟。而廣森藉承談末。經示端倪。以爲湘水波瀾。稱言絕妙。春旗楊柳。無字可刪。既舉斯閑。自覽其切。遂得粗知偶事。強附駢聲。它日韓陵片石。免作驢鳴。樊南一編。積成獺祭。誰開間介。即被雕朽耳矣。蝸角荒塵。蛇年草創。東鄰紫映。顧慚拙宦之居。北市置塵。差遠小人之宅。然而方纔布武。廣不由旬。在陸疑舟。有肉似甕。雖開府小園。何嘗無賦。而長卿陋室。未必堪銘。豈意金壺副墨。石室餘縑。錫以題辭。光其棗稅。入長公別集。彌榮三槐之堂。乞退之一言。便擬雙松之舍。竊惟校漢儒林。東京尙已。稱鄉先達。北海褒然。是以小已忘涯。高山仰止。低徊哲範。若見之牆。撫擬賢容。欲圖之壁。重聞命焉。曰姑舍是。賢者識大。不當囿以專家。古之離經。非徒尋夫章句。許君謹案。何據膏肓。雜問之志。六藝之論。詎要道之微言。祇通人之鄙事。若廣森者。私淑於趙商張逸之間。激揚於賈釋孫評之後。旁要夕桀。僅取多能。觚字曲聲。惟資小學。上士勤行之道。本未朝聞。羣經淆亂之言。何曾晚定。若其潮高。密之微風。追不其之逆躅。足使冀州畔援。折敬伊人。應劭宏通。願爲弟子。二千石青綬。式駟馬以旌門。百萬衆黃巾。望單車而解甲。世無孔子。當亦游夏者流。第之宋儒。不在張程以下。是則慕爾相如之名。其去

猶遠。讀臺孝感之傳。此志終狂。苟將業彼箋疏。呻其佔畢。而謂著書通德。訓詁傳於此名。寫定禮堂。祝史尊其陳數。匪直鄧公之學。謬爲聖證。詆譏抑幾輩傳之徒。乃有步舒惑陋。與因荷言提。歸諸盍各。負牆無地。迪牖何年。起安石於東山。志今益遠。望義和於南陸。心與俱馳。

上父執梁山舟侍講札

仰紆椽筆。俯賜楹題。遙蒙七字之褒。愧荷百朋之錫。廣森問奇有志。驚駕十回。執轡無因。龍門萬丈。輒用裝之玳瑁。軸以琉璃。馳賞墨林。重齊紈之價。懸輝聖壁。知蜀素之珍。謹謝。

與同年林編脩澍蕃札

承惠永樂大典護葉紙。故府珍收。前朝舊製。比澄心於宋紙。殊鏡面於吳箋。杜武庫之蜜香。初分帝賜。張茂先之側理。遂惠臣家。染墨匪輕。捧翰知重。謹謝。

謝人代撰詩札

足下才高倚馬。價重雕龍。范岫之管一雙。江淹之錦數尺。僕略解蕪吟。其如拙速。自觀藻咏。兼切欽遲。輒復乞餘潤於懸河。分未光於鑿壁。孔璋多事。亦代裁書。安國少文。居然賦几。所幸謬同瓊瑋。竊向秀之標。緇猶恐易辨淄澠。忱陸機之杼軸。謹謝。

戴氏遺書總序

東原先生姓戴氏。諱震。徽州休寧人也。學於古訓。言行可法。以薦爲四庫全書纂修。賜官庶吉士。春秋五

十有五。乾隆丁酉五月二十七日疾卒。凡所著文章經義若干卷。叔父農部公先生之昏因也。綴而刊之。廣森嘗聞先生緒論。又感先生崇闡漢儒而不終其志以歿。乃爲序曰。

種惟樂遊講藝。訪太傅於石渠。元日談經。坐侍中於重席。時則玉羊旣遠。金虎初開。著學官者凡十四家。說稽古者成數萬字。至若五是六沴之徵。定君陽武。三科七缺之法。繫獄淮南。士苟通經。皆能致用。蓋原其授受。本屬參商。敍其世年。未睽昌闕。是以祖之前師。沿之後葉。北方戎馬。不能屏視月之儒。南國浮屠。不能改經天之義。夫學有優劣者。時也。經有顯晦者。數也。五君晚出。非漢博士之傳。千禩相仍。廢鄭司農之註。縱橫異說。別創先天。顛倒聖文。悉更後定。特以腐儒炫視。易謬驪黃。末士明經。原求青紫。但遵甲令。粗知帖括之詞。疇克庚言。紹彼先民之作。敏而好學。信而好古。惟於戴君見之。已君以梅姚舊僞。孔蔡謬悠。妄云壁下之書。猥有杭頭之字。古文一卷。祇出西州。小序百篇。舊名北斗。正謨攝詰。歷黃序而僅存。月采豐刑。遭赤眉而已燼。乃或誤援伊訓。滋元年正月之疑。強執周官。推五服一朝之解。譬之爭年。鄭市本自兩非。議瓜驪山。良無一是。是用翦除假託。折衷羣淆。步驟五三。錄目四七。爲尙書義考。未成。成堯典一卷。又以要聞五際。尙論四家。毛傳孤行。是觴源於牟妙。鄭箋破字。每毫采於轅嬰。莫不假聲注文。以意逆志。誠古訓之所式。多識之所資也。雖其篇冠以序。擇焉不精。或云託諸西河。或云造諸東海。然嗣矜貽玖。何必欲色之音。交扈羅鷺。實爲陳古之刺。爲毛鄭詩考正四卷。別爲詩補傳。未成。成周南召南二卷。君之入書局也。西京客史。夙善徐生。東觀中文。遂分淹禮。乃取忠甫識誤。德明釋文。殫求豕亥之差。期復鴻都。

之舊互相參檢頗有整齊。削康成長衍之條。退喪服廁經之傳。爲儀禮正誤一卷。鄭斤粵鍾之篇。備遺事職。穹蓋星弓之教。首列巾車。九經九緯。營國有方。五溝五涂。莫水有則。尋筵既度。遂知洛邑之朝。圭縹未縣。孰辨營邱之夕。以至肆懸舞甬。五等琮璜。槐里樽空。椎成劍沒。大夫嫁女之器。未必皆真。單于賄漢之銘。何嘗盡僞。謹鑑之所畫績。梁鼎之所更釐。不可參稽。將無競爽。爲考工記圖二卷。古者冕服以祭。弁服以朝。祭則衣純。朝則以布。芾形連帶。制異於直方。履色從裳。次分於績繡。周壇饗帝。大裘降繁露之華。魯禘嫌王。旒璫飾丹雘之祝。等威昭焉。文質備焉。道學起而儒林衰。性理興而曲臺絕。齊秦委武。莫識稱名。殷夏闡章。焉能考據。湖增冰於積水。示祭海於先河。爲學禮篇一卷。冠其文集十卷之首。且夫一陰一陽之爲道。見仁見知之爲性。通於六籍之爲學。辨於萬事之爲理。謂理具靈臺。則師智者得。謂學遺象罔。則悟寂者先。豈有略窺語錄。便詡知天。解斥陽明。卽稱希聖。信洛黨之盡善。疑孟氏之未醇。其說空空。其見小小。蓋釋鄭君生質之訓。誦周雅數木之箋。所謂受中自天。秉彝攸好。孔提可按。漢學非譌。爲原善一卷。孟子字義疏證三卷。大學中庸補註各一卷。君之學術。此其大端歟。景純有云。爾雅者九流之津涉。六韜之鈐鍵。虎闕小學。未束髮而知書。豹鼠奇編。不下席而觀古。故辨言之樂。對於三朝。首基之文。問於五始。至於殊方別語。絕代離詞。皆轉註之指歸。亦凡將之墜緒。爲爾雅文字考十卷。方言考證十三卷。書教有六。最夥諸聲。叔重無雙。惟傳解字。若乃部分平仄。母別見溪。官家恨狹。羊戎之所自爲。天子聖哲。梁武之所不信。古人韻緩。止屬椎輪。後世音繁。實精引墨。君審其清濁。導以源流。旁通反紐。發周沈之舊聞。上協

詩騷採顧江之新義爲聲韻考四卷聲類表十卷

先生文集。尚有聯語二十章及六卷論三卷自序。此二種遺稿未見。

於是辨韻之餘留觀百

氏研音之下雅愛三閭以爲城臺訪女近窈窕之遺聲湘水褰芳櫓榛苓之逸響叔師註而未詳辨招附而不可核之漢志名從主人爲屈原賦注四卷自騷人分散鄒大失居九章中落昧商高積矩之言八線西來竊師氏旁要之算而耳聽下土穴見小儒不知五五之開方輒薄九九之賤技哨壺斗五律管徑三元晦以之存疑季通以之強說未知紀步何能讀宅柳之經未曉偃句何能治上輿之記爲九章補圖一卷原象一卷古歷考二卷歷問二卷昔趙商難禮先求五服之方景伯受詩卽涉七州之地君山川能說郡縣成圖鄧元故籍證其絳纓崑渤今流條其絡脈爲戴氏水經註四十卷水地記一卷直隸河渠書六十四卷嗚呼君之著書可謂博矣君之見道可謂深矣向使壽之以年行其所志下安輪於都尉授梯几於鴻臚雍宮未建命曹褒以定儀大予將成詔宋登而持節雖復辨卿訟闕公羊未必能明子駿移書逸禮難其置立而太山郡將北面稱師上蔡通侯西行受業則何湯旣貴轎車方賜於五更君上從遊錄牒庶多於萬計豈謂陰堂告祀圓石鐫名一經之寫定無年三歲之瓊瑰已夢清明卷佚長封下馬之陵通德人亡不待嗟蛇之歲然而太元覆瓿終遇桓譚都養陳謨彌尊伏勝鄭鄉絕學綯千百載而重興戴氏遺書於十三經其有補悲懷逝者延佇將來

王氏醫治序

語曰若金在鎔惟治者之所鑄貢云三品見情之列居前國有六工築氏之齊執下所以激沈清濁甄類

苦良蓋吏之有課史之有評詩之有品書之有斷方諸大治厥義維鈞則我更生王君於是有醫治之作言夫鵠居既遠鯢壽斯希四節潛乖於冥造之初六鑿相環於微眇之後雖復桃弧春射天札猶多荆盾秋毆歟噫詎少由是權輿百艸赭鞭奉軒后之威消息三停素女發明堂之訣入靈蘭之室即受奇肱過長桑之舍方聞禁要冰臺三歲鐙刺九名乞錄籍於開陽駐顏暉於連石是以刑臣西上降綸玉而求方世子南征解蒸瑜而採藥然而青囊委蛻卷帙丙丁玄晏淪湮經虛甲乙自餘楚賦鮮稱九折之良不遇涪翁孰曉六微之技昔之視垣一方見心六孔長兄察色仲子覘豪裏紺知生茲青知劇龍門濁浸回通關蟄之經駮穴澄源內合支蘭之藏豈有循難轉急握虎翻舒狀榆落而非真期韭英而罔驗帷中十指曾迷婦寺之殊壺子三淵不辨權衡之氣斯診脈者失也遙傳帝問僅九雀於茅蒐閒採軍謠拯河魚於麥鞠黃環赤箭未錄桐君漆葉青黏略存樊氏而或倍偏枯之餌倖瞑眩之瘳壹蛄毋以爲君謂烏頭而可帝必致以熱益熱以寒增寒心識分銖非其能事治蠲湯液去之愈遠斯處劑者失也將謂上商少羽會於六六之紀欽徵加宮判於五五之性則七元詭歷孰司天其可憑八谿蘊深譬迎雲而未極相如瘠病非皆黜作之時杵曰瘵店何必容平之月玉機旦讀祗亦空文金匱年荒已爲陳迹循環藟素石溜仍疎俯仰鉛黃膠飴莫效斯泥古者失也晚有完素嗣以義烏損陽益陰墜離升坎廢溫中之味先寫下之法五分之熨奚施百灌之寒垂殆嗟乎春燠者生之徒秋淒者殺之令故楊泉有言道家尙冷醫家尙溫今輒反之使升明火化絕於君主之官洒淅陰淫客於奇恆之府懸方肘後安望延齡納斧胸中將無伐

性斯見偏者失也。王君仁者愛人，學焉先覺，自垂絳髮，厭窺中古之書，早悟華琳，似飲上池之水，若乃萬金良藥，九部奇經，審咬咀於毫釐，候樞闔於尺寸，經過濟北，便識才人，留滯交南，倘逢仙令，廣峨嵋之術，祕欲託嬰巢，拾長沙之仆漏，宣明孫絡，徵其治案，已驚掛胞之車，推其神工，應寤援熊之夢，且復濡烟橘井，比事芝蘭，岐區復逆之詞，和緩春秋之策，意夢信史之傳，俞矯寓言之篇，以及歲稽四失，周官之所殿，月爲千軸，梁皇之所嚙，靡弗收羅，於是法戒品題，備適流別，洞該者矣，猶恐未士膚受，攻乎異端，襲高陽之紕紛，昧河間之結滯，死如可作，疑懷躍冶之鳴，生不同時，尙有載金之悔，是則辯囿何窮，狂泉不竭，存其正論，賈諸古人。

張舍人頌熱河集序

昔嚴夫子有言，經有五涉，其四州有九游，其八猶以聽覽所及，不踰白阜之封，吟翰所被，未罄黃坤之域，亦有落梅驄馬，迢遙隴上之章，低草牛羊，敕勒軍中之句，鏡歌白鼻，樂府黃鸝，過青冢而怨琵琶，弭白檀而思鼙鼓，莫不叩響風疏，聯辭雲委，然而悲笳九月，塞草前衰，橫笛三臺，關柳易折，羈寄之情長，感慨之興短，唯殺之音多，藻績之詞少也，瘦銅舍人負沈宋之才，溶常楊之職，紫荷奉綦，紅藥當階，曉趨丹屏，夕拜青瑣，直鸞闈而端牘，對雞樹而流唱，固嘗倚馬七紙，握蛇百篇，人誦穆如之風，世傳蔚爾之文矣，熱河者，神明界局，地貳陪京，里其道路，既遠百郡之外，奠其邑居，仍當五都之勝，國家陋甘泉於漢氏，侈仁壽於隋年，以爲堯皇游豫，必作宮於成陽，周王考卜，亦朝步於豐水，每中郢履節，清明告風，乃瞻北顧，此焉

清暑時則舍人滿歲灌謁往覲交閭。攷旦首塗兼辰戒道。房雲在空箕風動衣。天日姓晏。宇宙曠明。仰瞻宸居之麗。俯察區陬之廓。得不揄揚舞詠。祗和煙墨者乎。若乃層巘隱天。長波帶地。黃靈訪道之山。翠嶠沈玉之渚。舍人極覽津委。旁綜載牒。徵鮑邱之湮流。問濡水之故瀆。博望之槎萬里。探析岷源。太沖之賦三都。參稽方志。是則縹囊一詠。卽注桑欽之經。墨林五言。可備闕駟之記。且夫捐雲之簪。半柯自奇。銜霜之松。寸莖斯見。讀是編者。其可以知舍人之詩也已。

儀鄭堂文卷二

閨秀王采薇長離閣詩集序

昔靜女之三章。取彤管焉。被壽人于笙磬。非無都蕩之詞。列繡宿于義娥。不廢葦杭之怨。葛山少婦。執越布以歌勞。柘館貞嬪。裂齊紈而歎逝。書之硯北。盡金屋之奇才。選入江東。卽玉臺之新詠。女子善懷。香奩尙已。則有通華。崑望。淑懷。閨儀。南國新人。東家舊姓。十三織素。二七裁衣。漱潤斲于瓜年。剡芳名于茗玉。長言婉婉。女師德象之篇。好句流連。吉甫清風之誦。前身蓮葉。不踐陳泥。他日椒花。必多新製。况復鴛鴦。左顧孔雀。南飛歸小婦之高堂。調弦錦瑟。識上頭之夫婿。絡轡青絲。鑑熏夕而其香。鏡照塵而同影。司空博物。本兒女之多情。內史工書。作夫人之弟子。斯又王郎天壤。愧此多能。居十桑榆。羨其嘉耦者也。若夫紅羅帳掩。朱鳥窗開。初成墮馬之妝。自服游龍之彩。繡餘茵萼。倦卽停鍼。製就茱萸。織當當戶。莫不語綠情慳。咸與候選。牙管一雙。金釭二等。雪凝謝苑。擬飛絮于風前。日出秦樓。歌條桑于陌上。至如雙聲讀曲。十索名題。陽羨新茶。紉書鬪罷。南安早栗。故事疏來。香沈水而郎歌。繭懸絲而妾和。西陵松柏。便託同心。北地焉支。彌增善睐。香囊叩叩。是繁掾之定情。雜珮珊珊。有鄭姬之警夜。奚止爲歡玉女。爭投百箭之繞。射雉珠皐。始見三年之笑。又如草生南浦。梅下西洲。贈子將離。呼卿小別。葦蘆盈匊。指五日以爲期。蕭艾憐人。比三秋而更遠。遺簪紹繚。破鏡連環。書檢六張。文周四角。蘭成集上。曾裁寄婦之言。徐淑詩中。不少

望夫之什亦或少君歸里對挽鹿車候光去吳仍偕鴻婦漢水之平塗七百江陵之遠道千三春嶂青螺來發雙蛾之色秋波白鷺迴成九曲之珠是則七邑東征曹家善賦百泉丹楹衛女寢憂抑亦詩發乎情情生于文者與然而蓉生江上杏倚雲邊未免牢愁誰能理遣重以諸姬適邨永歎肥泉季娣歸邨先零弱歲芝焚易感薰蕕何堪幾日飛龍祇愁藥店數聲別鵲忽上琴絲簾處則榻冷琉璃吟筆則牀空翡翠左思嬌女能無失母之悲班固佳甥應有問神之作於是子荆改服文度多傷求故劍于箱簾綬遺翰于鏡檻紅桃麗字遂書河北之箋白蠟妍辭徧識閨中之媛而或者謂結璘有藥弄玉疑仙三髻雲鬟蓬壺已隔層波羅轍洛浦仍逢倘作異聞傳諸好事則綢繆贈答將皆戴勝之瑤觴宛轉聲音盡入彩鸞之唐韻宋薇小傳云亡後託凡仙致寄外八絕自言尸解仙去居初利東宮掌上界○采薇爲進士及第翰林編修今山東兗沂曹濟道孫星衍之史

丁酉八月陶然亭宴集序

陶然亭者都中士大夫比之周侯藉卉之地右軍修禊之所或逢美日則重席相邀將有遠行則百壺出祖僕至者屢矣然其事無稱爾若乃主人望重新封燕領之侯賓客聲華將應鯢溟之運今日之會是爲盛與通政王公被雍鷺之表儀歷附蟬之清秩昔九隆不諛六士隳行終童請甌越之纓介子奮樓蘭之志高平第一聚米成山草奏盈千以鞍爲几入陪玉帳出贊金鼓曾借箸以成勞遂磨盾而書捷嘉河西之記室每問班彪爲淮右之銘辭無過韓愈于是從軍詩出盡識公孫絕幕歸來仍多拈客粵以在丁之歲中卯之辰載酒來遊朋舊式宴斯時也漢興廉孝之科周上賢能之籍澤雲西北瑞我玉京竹箭東南